



# TELENISA

STATISTIK & DAPATAN 2020

كۆمەنگەن كەنگەن

## Diterbitkan oleh

**SIS Forum (Malaysia) - Sisters in Islam**  
No. 4, Lorong 11/8E, 46200 Petaling Jaya  
Selangor Darul Ehsan, Malaysia.

T +603 7960 3357 / 5121 / 6733  
E sis@sistersinislam.org.my

W www.sistersinislam.org

## Sisters in Islam



Sisters In Islam



@sistersinislam.my



@SistersInIslam



SistersinIslamMYS

## Penulis

Shareena Sheriff and Ireeny Muzammel

## Penyelia

Rozana Isa

## Reka Letak

Teddie Goh

## TELENISA



@telenisa.sis



@telenisa



@telenisa\_sis

# Kandungan

4 KATA-KATA ALUAN PENGARAH EKSEKUTIF

5 TINDAKAN SUSULAN TERHADAP PANDEMIK COVID-19

7 KLIEN KAMI

- Demografi Klien
- Lokasi & Pendapatan Isi Rumah
- Sektor Pekerjaan & Kerjaya
- Taraf & Tempoh Perkahwinan

11 HAK ISTERI

- Fasakh & Punca Perceraian
- Suri Rumah & Harta Sepencarian

15 HAK KANAK-KANAK

- Hak Penjagaan Anak Ketika Pandemik

16 PERHATIAN KHUSUS

- Perkahwinan Bawah Umur Di Malaysia Ketika Pandemik
- Bantuan COVID-19 Untuk Wanita & Keluarga
- Perkembangan Terkini

19 BAGAIMANA ANDA BOLEH MEMBANTU?

# Kata-kata Aluan Pengarah Eksekutif

Tahun 2020 ialah satu tahun yang tidak akan kita lupakan. Pandemik COVID-19 telah memaksa kita menyesuaikan diri dengan norma baharu dalam setiap aspek kehidupan.

Klien-klien yang dibantu melalui Khidmat Bantuan Guaman Telenisa telah mengharungi pelbagai cabaran yang amat sukar. Kami menjangkakan ramai wanita terpaksa mendepani pelbagai dugaan sebaik sahaja Perintah Kawalan Pergerakan (PKP) diumumkan. Amat malang apabila jangkaan kami tepat. Sepanjang tahun 2020, kami telah menganalisis pelbagai cabaran yang terpaksa diharungi wanita. Mereka harus membahagikan masa bekerja dari rumah dan masa untuk menjaga anak, mereka juga harus memantau kerja sekolah anak sambil menjalankan aktiviti seperti memasak, mengemas dan pelbagai kerja lain yang terlalu banyak. Beban sebegini lebih mudah ditangani wanita jika pasangan mereka turut sama membantu melakukan kerja-kerja rumah. Jika tidak, tekanan kehidupan berumah tangga akan terus meningkat.

Menghadapi jangkaan ini, Telenisa serta pertubuhan bukan kerajaan yang lain telah bersiap sedia menyediakan khidmat dan bantuan kepada wanita yang memerlukan. Kami telah menambahkan waktu perkhidmatan Telenisa dari tiga hari ke lima hari. Kami turut lanjutkan waktu pejabat sehingga jam 10 malam.

Isu yang turut kami tumpukan ialah bagaimana wanita boleh mendapatkan bantuan dan perlindungan sepanjang pelaksanaan PKP. Kes keganasan rumah tangga meningkat kepada 57% sejak PKP bermula. Statistik Telenisa tahun 2020 menyebut keganasan rumah tangga sebagai penyumbang utama kepada keruntuhan perkahwinan yang direkodkan setinggi 23% berbanding dengan 15% pada tahun 2019. Ini menunjukkan betapa sukar cabaran yang wanita harus lalui ketika pandemik ini.

Antara sebab lain yang turut meruntuhkan rumah tangga ialah apabila para suami tidak memberi nafkah yang direkodkan pada 18%. Suami yang tidak memberi nafkah kepada isteri yang tidak bekerja atau tidak mempunyai pendapatan yang mencukupi akan memaksa isteri tersebut mencari pekerjaan baru atau pendapatan tambahan yang lain. Seperti yang kita sedia maklum, peluang pekerjaan ketika musim pandemik amatlah terhad.

Timbulnya dua punca baharu pada tahun 2020 berkenaan keruntuhan rumah tangga yang tidak pernah dilaporkan pada tahun sebelumnya, iaitu ialah masalah kewangan dan poligami. Sumber kewangan yang terhad akan meletakkan beban ekonomi yang lebih berat ke atas isi rumah. Ketika pandemik ini juga, sesetengah isteri hanya mendapat tahu suami mereka telah mengahwini isteri baru tanpa restu atau kebenaran mereka.

Tahun 2020 juga terdapat peningkatan setinggi 94% dalam pertanyaan berkenaan cerai fasakh. Melalui contoh-contoh ini kita dapat menyimpulkan bahawa musim pandemik telah mengganggu-gugat dinamik rumah tangga, lalu mewujudkan situasi yang amat sukar untuk wanita tangani dan hadapi.

Tidak dapat dinafikan lagi betapa pentingnya Khidmat Bantuan Guaman Telenisa dalam membantu wanita dan lelaki menangani musim pandemik yang mencabar ini. Kami amat berterima kasih kepada Yayasan Sime Darby dan pihak-pihak lain yang telah menyumbang kepada Telenisa. Tanpa penyumbang kami, adalah sukar untuk kami menghulurkan bantuan kepada mereka yang amat memerlukan.

**ROZANA ISA**  
Executive Director, Sisters in Islam



# Tindakan Susulan Terhadap Pandemik Covid-19

Tahun 2020 merupakan tahun yang paling mencabar buat Telenisa. Perintah Kawalan Pergerakan (PKP) telah dilaksanakan pada 18 Mac 2020 untuk mengawal penyebaran wabak COVID-19. Kawalan pergerakan menyeluruh telah dilaksanakan di seluruh negara, secara tidak langsung menghadkan kebolehgerakan rakyat. Halangan ini telah diringankan secara berperingkat kemudiannya. Setakat April 2021, pergerakan dalam negeri telah dibenarkan, namun masih banyak tempat kerja yang meneruskan kesesuaian untuk bekerja dari rumah atau mengamalkan kehadiran bergilir ke pejabat.

Kami turut menyesuaikan tatakerja kami mengikut peraturan yang ditetapkan. Kami bimbang terhadap kes keganasan rumah tangga yang telah melonjak naik sebaik PKP dijalankan. Oleh itu, kami telah melanjutkan waktu operasi Telenisa dari 9 pagi hingga 10 malam untuk lima hari seminggu buat sementara waktu. Kami kembali ke waktu operasi yang biasa iaitu dari 9 pagi hingga 5 petang, dan dari Isnin hingga Jumaat (waktu

operasi pra-PKP kami adalah dari 10 pagi hingga 5 petang sepanjang Selasa hingga Khamis).

Kami juga telah memperluaskan platform Telenisa dari talian tetap ke WhatsApp (012-812 3424). Kami ingin permudahkan situasi di mana klien menghadapi kesukaran untuk membuat panggilan ke talian tetap disebabkan oleh keadaan di rumah mereka yang tiada privasi. Namun, kendalian cara WhatsApp berbanding talian tetap membawa kesukaran bagi pihak kami untuk mengumpul data dari klien.

Setiap tahun Telenisa akan menerima 29 pelajar undang-undang dari NGO Legal Aid Programme. Namun, kami hanya menerima seramai 6 pelajar sahaja pada akhir Julai 2020. Disebabkan oleh kes wabak COVID-19 yang semakin meningkat, Badan Peguam Malaysia telah memutuskan untuk menangguhkan program guaman tersebut buat sementara waktu. Penangguhan ini memberi kesan ke atas ketersediaan penasihat undang-undang untuk perkhidmatan Telenisa.

Sejak pelaksanaan penjarakkan sosial dan PKP, waktu operasi dan sistem pengurusan kes mahkamah Syariah turut terjejas. Banyak kes telah ditangguhkan mengakibatkan terkumpulnya kes tertunda yang belum selesai. Sesetengah mahkamah Syariah tidak membenarkan pelajar undang-undang menghadiri sesi mahkamah untuk mengawal bilangan orang yang berkumpul di situ. Program pemantauan mahkamah juga tidak dapat kami diteruskan.

Kami perhatikan terdapat kemerosotan dalam panggilan yang dibuat ke Telenisa dari Mac hingga April 2020 sepanjang pelaksanaan PKP yang pertama. Antara kes-kes yang kami terima semasa tempoh ini termasuk kes hak penjagaan anak di mana perintah sementaranya telah tamat tempoh, kes-kes yang ditunggak tanpa penerimaan sebut tarikh yang seterusnya, kes pertikaian hak penjagaan anak semasa PKP, kes-kes keganasan rumah tangga dan juga rayuan untuk mendapatkan bantuan makanan dan kewangan.

Untuk meneruskan program khidmat masyarakat sepanjang PKP, kami telah memperluaskan perkhidmatan kami ke internet. Kami turut menyiaran webinar bersiri atas talian yang diberi nama "Telenisa Tells Live" di halaman Facebook Telenisa and Sisters In Islam. Penstriman pertama kami disiarkan secara langsung pada 7 Mei, 2020.

Kami telah berjaya menerbitkan 22 sesi webinar "Telenisa Tells Live" sepanjang tahun 2020. Pelbagai isu yang dibincang termasuk isu berkaitan hak asasi wanita, isu sosio-ekonomi yang dihadapi wanita, isu hak kanak-kanak, isu kekeluargaan Islam termasuk perundungan keluarga Islam dan juga isu berkaitan gender. Setiap webinar yang disiarkan, kami tampilkan juga sesi soal jawab di mana para panelis menjawab soalan-soalan yang diajukan secara langsung oleh para penonton.


Kecenderungan terhadap kerja kami daripada pengikut baru susulan penyiaran webinar tersebut adalah amat memberangsangkan. Secara purata, kami telah menerima sebanyak 2,423 tontonan setiap sesi. Kami ingin mengucapkan terima kasih kepada 31 ahli panelis kami yang telah menyumbangkan masa dan ilmu yang dikongsikan bersama para penonton. Kami mempunyai perancangan untuk meneruskan program webinar ini pada masa akan datang.




# Demografi Klien

Untuk tahun 2020, Telenisa menerima seramai 422 orang klien, satu penurunan dari 610 orang pada 2019. Seramai 364 orang merupakan klien baru, manakala 58 orang adalah klien ulangan. Sejumlah 373 orang klien terdiri daripada wanita (88%), 31 orang klien adalah lelaki (7%) dan 18 (5%) orang klien tidak dikenal pasti. Penurunan jumlah klien ini berkemungkinan disebabkan oleh kesan musim pandemik.

## Klien Ulangan & Klien Baharu (2018-2020)



Sepanjang tahun 2020, kami mendapati seramai 352 orang klien (83%) bercenderung untuk berhubung dengan kami melalui talian tetap dan WhatsApp, diikuti oleh 50 orang melalui emel (13%), melalui Facebook seramai 14 orang (3%), dan sebilangan 6 orang klien (1%) lebih selesa untuk jumpa bersemuka dengan kami.



# Lokasi & Pendapatan Isi Rumah


Sebahagian besar klien yang kami terima pada tahun 2020 adalah seramai 418 orang (99%). Klien-klien ini terdiri daripada rakyat Malaysia dan juga rakyat Indonesia, Filipina, Jepun, India, Afghanistan, Pakistan, Sudan dan Australia yang menetap di Malaysia. Selebihnya terdapat 4 klien (1%) yang telah menghubungi kami dari luar negara.

Kebanyakan klien kami berpusat di Lembah Klang, iaitu seramai 276 orang (66%). Angka ini dipecahkan lagi kepada taburan negeri dan wilayah di mana klien dari Selangor adalah seramai 161 orang, diikuti oleh Kuala Lumpur seramai 110 orang dan Putrajaya dengan 5 orang klien.

Sebahagian 34% lagi terdiri daripada klien dari Johor seramai 43 orang, Sabah dan Labuan seramai 19 orang, manakala Perak mempunyai 13 orang, Negeri Sembilan terdapat 10 orang klien, Penang seramai 9 orang, serta Pahang and Melaka seramai 8 orang klien masing-masing. Negeri-negeri yang mempunyai kurang dari 7 orang klien adalah negeri Terengganu (6), Kedah (5), Sarawak (3) dan Perlis (1). Dua orang klien kami dari luar negara menetap di Australia (1) dan India (1). Namun, terdapat seramai 17 orang klien yang tidak mendedahkan lokasi mereka kepada kami. Kami juga telah merekodkan sebilangan 22 orang klien dari Sabah dan Sarawak. Disebabkan oleh pandemik ini, Telenisa terpaksa menangguhkan program dan kempen kesedaran yang ingin kami laksanakan di Sabah dan Sarawak.

Sejumlah 28% daripada klien kami tidak mendedahkan pendapatan isi rumah. Sementara itu, sebanyak 24% daripada klien kami mempunyai pendapatan isi



## Lokasi Klien (2020)



rumah bulanan antara RM1,001 dan RM2,500. Sebilangan 21% lagi hidup dengan pendapatan dari RM2,501 hingga ke RM5,000 sebulan, manakala 15% daripada klien kami hanya bertahan dengan pendapatan bulanan RM1,000 dan ke bawah. Berdasarkan statistik pendapatan isi rumah tahun 2020 yang telah kami analisis, terdapat 60% daripada klien kami yang terdiri daripada golongan B40 (kumpulan terendah) dengan pendapatan bulanan yang tidak melebihi RM4,360. Ini diikuti dengan sebilangan 10% daripada klien kami di kalangan golongan M40 (kumpulan pertengahan) dengan pendapatan bulanan di antara RM4,361 ke RM9,619. Sebagai makluman, adalah rendah kebarangkaliannya untuk klien kami datang dari golongan T20 (kumpulan tertinggi) yang mempunyai pendapatan bulanan sebanyak RM9,620 dan ke atas.

# Sektor Pekerjaan & Kerjaya


Perolehan data di sektor pekerjaan pula telah mencatatkan sebanyak 41% klien kami yang bekerja di sektor swasta, sementara 32% lagi tidak mendedahkan sektor pekerjaan mereka. Sektor yang lain-lain berada pada tahap 20%, manakala klien yang bekerja dengan kerajaan adalah sebanyak 7%.



Kerjaya klien Telenisa yang terbanyak direkodkan adalah terdiri daripada staf sokongan pada 18% dan diikuti oleh suri rumah pada 17%. Selain itu, peratusan kerjaya yang sama direkodkan pada 14% adalah terdiri daripada kerjaya profesional, kerjaya yang lain-lain, serta klien yang tidak mahu mendedahkan kerjaya mereka. Klien yang tiada pekerjaan dihitung sebanyak 11% berbanding dengan 7% pada tahun 2019. Kadar pengangguran ini bertambah susulan masalah ekonomi yang disebabkan oleh pandemik. Merujuk kembali kepada informasi yang dikongsikan oleh klien kami, terdapat ramai klien mahupun suami mereka yang telah kehilangan pekerjaan. Klien yang masih bekerja melaporkan bahawa gaji asas mereka telah dikurangkan sebanyak 30% hingga 50%. Selebihnya, terdapat 9% klien kami yang bekerja sendiri, manakala 3% lagi terdiri daripada para pelajar.


# Taraf & Tempoh Perkahwinan

Data yang dikumpul melalui Telenisa untuk tahun 2020 turut menganalisis taraf perkahwinan klien kami. Sebilangan 57% daripada klien kami sudah bercerai, sementara 15% lagi masih berkahwin. Seramai 14% klien kami sedang menghadapi proses perceraian, manakala 12% lagi sudah berpisah daripada pasangan mereka. Klien yang masih bujang atau berada dalam golongan lain-lain, masing-masing direkodkan sebanyak 1% sahaja.



Data juga menyatakan peratusan tertinggi sebanyak 25% klien kami tidak mahu mendedahkan tempoh perkahwinan mereka. Ini diikuti oleh klien yang mendedahkan tempoh perkahwinan mereka antara 4 hingga 7 tahun pada 20%, dan klien yang sudah berkahwin lebih daripada 10 tahun adalah sebanyak 18%.


Tempoh Perkahwinan



# Fasakh & Punca Perceraian

Tahun 2020 menyaksikan kebangkitan dalam pertanyaan mengenai fasakh di kalangan klien kami. Pada 68%, fasakh kekal sebagai pertanyaan yang tertinggi mengenai perceraian sejak tahun 2016.

Fasakh ialah satu kaedah perceraian yang dituntut oleh isteri yang lazimnya berlaku apabila suami enggan menjatuhkan talak. Kes fasakh yang semakin meningkat mencerminkan keadaan rumah tangga di kalangan masyarakat kini. Namun, peningkatan ini juga adalah satu petunjuk bahawa wanita kini lebih peka dengan hak-hak mereka dan tidak perlu bertolak ansur dengan ketidakadilan dalam perkahwinan.



"Setelah kami bertengkar dia memukul saya beberapa kali. Dalam keadaan yang masih tegang antara kami, suami menjatuhkan saya ke bawah dan mula merogol saya. Dia tidak berhenti walaupun saya menangis dan menolaknya. Saya berasa amat sedih dicemari sebegitu. Saya tidak boleh melihat wajahnya dan lindungi muka saya dengan bantal. Sambil saya menangis, suami terus memperkosa saya."

- Klien  
Telenisa

## Punca Perceraian

Keganasan rumah tangga direkodkan sebagai punca perceraian yang tertinggi pada 23% untuk tahun 2020. Kes keganasan rumah tangga kekal sebagai punca utama untuk perceraian sejak tahun 2019. Klien yang terpaksa berdepan dengan isu-isu keganasan menyatakan mereka telah mengharungi pelbagai bentuk keganasan dan penderaan ketika musim pandemik. Antaranya, keganasan dan penderaan fizikal direkodkan pada 37%, penderaan psikologi pada 31%, penderaan sosial pada 11%, penyalahgunaan kewangan pada 16%, dan keganasan seksual pada 5%.


Punca perceraian lain yang telah direkod melibatkan kes-kes di mana suami gagal memberi nafkah pada 18%, kecurangan pada 14%, serta poligami dan masalah kewangan masing-masing pada 10%. Kami juga membuat perbandingan antara empat punca utama perceraian dari tahun 2018 hingga 2020.

## Empat punca utama perceraian (2018-2020)


PUNCA 1




PUNCA 2



PUNCA 3



PUNCA 4



*"Ketika PKP dan sesi bekerja dari rumah, saya terjumpa kad MyKid yang bukan milik anak-anak kami dalam dompet suami. Anak itu mempunyai nama suami saya. Bila saya tanya pasal kad itu, suami mengaku yang dia sudah beristeri baru dan anak itu adalah anaknya. Apa patut saya buat? Saya berasa amat dikhianati."*

- Klien  
Telenisa

Kegagalan komunikasi sering mengakibatkan pasangan berkahwin menuntut cerai, sejenis konflik yang telah lama meruntuhkan perkahwinan walaupun sebelum pandemik berlaku. Pasangan menghadapi kesukaran untuk berbincang mengenai isu-isu rumah tangga dan sering berselisih pendapat yang turut mengeruhkan pertalian antara pasangan.

Selain daripada kes di mana suami tidak memberi nafkah, terdapat juga suatu konflik yang sering meruntuhkan perkahwinan iaitu kecurangan. Tahun 2020 turut membawa dua punca perceraian baru yang tidak direkodkan dalam tahun-tahun sebelumnya. Dua punca tersebut ialah poligami dan masalah kewangan. Banyak isi rumah telah dan sedang mengalami masalah kewangan ketika musim pandemik ini. Ketidakupayaan untuk bertahan akibat keadaan ekonomi yang tidak menentu turut menjasaskan pertalian dalam perkahwinan.

Kemunculan poligami sebagai punca perceraian untuk tahun 2020 adalah disebabkan oleh para isteri yang baru mengetahui suami mereka sudah berkahwin lain tanpa restu dan pengetahuan mereka untuk bertahun lamanya. Isteri-isteri ini hanya mendapat tahu melalui kiriman teks atau menjumpai dokumen mahupun objek yang membuka rahsia poligami suami mereka.

# Suri Rumah & Harta Sepencarian

Pemerhatian Telenisa memberi pencerahan bahawa tuntutan harta sepencarian oleh isteri telah mengalami penurunan untuk beberapa tahun. Kebanyakan klien kami tidak menyedari tentang hak yang mereka ada sebagai isteri dan suri rumah. Pada tahun 2018, peratusan tuntutan harta sepencarian berada pada tahap 27%, namun ia kemudiannya menurun ke 20% pada tahun 2019 dan seterusnya menurun lagi ke 17% pada tahun 2020.

Lazimnya, suri rumah membuat anggapan yang salah bahawa mereka tiada hak untuk menuntut harta sepencarian kerana mereka tidak memberi sumbangan dalam bentuk kewangan. Maklum balas daripada klien kami turut mendedahkan di mana anggapan salah tersebut sering diberitahu oleh suami supaya mereka tidak membuat tuntutan ke atas harta sepencarian.

Berdasarkan Seksyen 2 Undang-undang Keluarga Islam (Wilayah Persekutuan) Akta 1984, harta sepencarian ditakrifkan sebagai harta yang diperoleh bersama oleh suami dan isteri sepanjang perkahwinan yang mengikut Hukum Syara'. Seksyen yang sama itu turut menyatakan "Hukum Syara" sebagai "Undang-undang Islam" berdasarkan mazhab yang sah.

Walaupun terma harta sepencarian merangkumi pelbagai jenis harta, sebahagian besar suri rumah berasa bimbang tentang kediaman mereka.

**Harta Sepencarian (2018-2020)**



Undang-undang Keluarga Islam mengiktiraf hak-hak seorang isteri untuk menuntut bantuan sampingan termasuk tuntutan ke atas harta sepencarian selepas perceraian. Seksyen 112(1) dan (3) di bawah Undang-undang Keluarga Islam (Wilayah Persekutuan) Akta 1984 memberi kuasa ke atas mahkamah untuk menetapkan tuntutan harta yang diperolehi sepanjang perkahwinan untuk dibahagikan selepas perceraian.

Seksyen tersebut memberi penekanan ke atas dua subseksyen. Subseksyen (1) menyatakan bahawa mahkamah mempunyai perintah untuk membuat pembahagian harta antara pasangan yang diperolehi bersama oleh kedua-dua pihak sepanjang perkahwinan mereka. Subseksyen (2) pula menyatakan mahkamah mempunyai perintah untuk membuat pembahagian harta antara pasangan yang diperolehi oleh satu pihak sahaja sepanjang perkahwinan.

Dalam penetapan pembahagian harta, mahkamah sama ada akan mengikut perjanjian yang telah dibuat oleh pasangan sebelum perceraian mengenai pembahagian harta milikan bersama, atau mahkamah akan menentukan pembahagian harta mengikut sumbangan yang diberikan oleh pasangan dalam perolehan harta sepencarian.

Mahkamah akan mengambil kira sumbangan secara langsung yang dibuat dalam bentuk kewangan, harta tanah maupun kerja. Contoh sumbangan tidak langsung adalah kerja-kerja rumah yang dilaksanakan oleh suri rumah. Sumbangan kerja rumah diiktiraf sebagai sumbangan dan khidmat seorang isteri untuk menjaga keluarga dan seluruh isi rumah. Seperti dalam kes **Zaiton Binti Enchi**

*“Suami saya nak bagi rumah yang kami duduki kepada isteri keduanya. Dia suruh saya pindah keluar. Bila saya tak nak pindah, dia cakap rumah kami di bawah nama dia dan saya tak pernah sumbang duit untuk pembayaran bulanan rumah tu. Dia cakap dia boleh buat apa saja dengan rumah tu sebab itu hak dia.”*

- Klien Telenisa

**Alli Iwn. Hussin Bin Enchi Mat** (13100-017-0273-2007), plaintif merupakan seorang suri rumah sepuh masa yang tidak memberi sumbangan secara langsung (seperti sumbangan kewangan) untuk menuntut haknya dalam pembahagian harta sepencarian. Setelah mempertimbangkan sumbangannya kepada keluarga sebagai seorang suri rumah, mahkamah telah menetapkan untuknya pembahagian harta sepencarian sebanyak satu-perempat (1/4). Pembahagian ini mengikut sumbangan tidak langsung dalam menjaga harta isi rumah, membesarakan anak-anak serta sumbangan kerja-kerja rumah sepuh masa.

Walaupun mahkamah mengiktiraf sumbangan kerja seorang suri rumah selagi dia melaksanakan

peranannya sebagai isteri dan ibu, namun mahkamah masih boleh membahagikan harta sepencarian sebanyak 50%. Pembahagian ini boleh dicapai jika isteri dapat membuktikan sumbangan secara langsung dalam menguruskan perniagaan atau sumbangan kewangan, contohnya, perkongsian pendapatan bulanan isteri untuk pembayaran pinjaman atau pembayaran deposit ke atas rumah. Ini menunjukkan bahawa suri rumah belum diiktiraf oleh mahkamah untuk menuntut 50% daripada harta sepencarian.


# Hak Penjagaan Anak Ketika Pandemik

Sepanjang tahun 2020, 52% daripada pertanyaan yang kami terima adalah berkenaan kes-kes hak penjagaan anak. Peratusan ini melonjak naik daripada 2% pada 2019. Ini diikuti dengan pertanyaan berkenaan hak lawatan pada 39%, peratusan yang menurun daripada 88% pada 2019. Pertanyaan berkenaan perampasan anak pada 9% turut menurun sedikit daripada 10% pada tahun 2019.

*"Saya memegang hak penjagaan anak-anak saya dan bekas suami memegang hak lawatan setiap hujung minggu. Tapi kerana kerjanya, bekas suami saya sering berjumpa dengan pelbagai orang setiap hari. Walaupun ketika PKP dia masih menghadiri mesyuarat yang bersemuka. Saya bimbang yang anak-anak saya akan terjangkit virus tu tapi bekas suami saya berkeras untuk melawat setiap hujung minggu. Saya berasa berat hati untuk membernarkannya melawat demi menjaga kesihatan dan keselamatan anak-anak. Apa yang boleh saya buat? Bolehkah saya menetapkan larangan ke atas hak lawatan bekas suami saya?"*

- Klien Telenisa

**Isu-isu Berkenaan Hak Penjagaan Anak (2019-2020)**



Daripada pemerhatian kami, terdapat perubahan besar mengenai keprihatinan ibu bapa terhadap hak penjagaan anak ketika musim pandemik jika dibandingkan dengan tahun 2019. Ini disebabkan oleh larangan rentas negeri yang telah menghadkan pergerakan ibu atau bapa yang mempunyai hak lawatan anak. Terdapat kes-kes di mana klien kami terpaksa menunggu beberapa bulan sebelum dibenarkan bergerak untuk melawat anak-anak mereka. Ibu atau bapa yang memegang hak penjagaan anak juga enggan memberi kebenaran melawat kerana khawatir akan risiko jangkitan COVID-19. Maka, situasi sebegini telah mencetuskan peningkatan dalam pertikaian tuntutan hak penjagaan anak sepanjang tahun 2020.

# Perhatian Khusus

## PERKAHWINAN BAWAH UMUR DI MALAYSIA KETIKA PANDEMIK

Kegawatan ekonomi yang disebabkan oleh pandemik ini telah menyulitkan keadaan dan taraf kewangan di kalangan keluarga berpendapatan rendah di mana perkahwinan bawah umur agak berleluasa. Pada Disember 2020, Kementerian Pembangunan Wanita, Keluarga Dan Masyarakat telah melaporkan terdapat 543 kes perkahwinan bawah umur sepanjang Januari ke September 2020 di mana Sarawak dilaporkan sebagai negeri dengan kes tertinggi.

Untuk perkahwinan bawah umur yang bukan Islam, kementerian turut menyatakan Jabatan Pendaftaran Negara (JPN) telah merekodkan sebanyak 23 kes dari Januari ke September 2020. Sarawak adalah negeri yang tertinggi dengan 7 kes, diikuti oleh Selangor dengan 6 kes. Kementerian juga tidak memberi sebarang keterangan lanjut mengenai data yang dikongsikan. Perkahwinan adat di kalangan bukan Islam tidak dimasukkan di dalam data ini kerana perkahwinan tersebut tidak direkodkan oleh JPN, tetapi oleh agensi yang lain. Akibat daripada sekatan pergerakan untuk

membasmi penyebaran COVID-19, banyak sekolah dan ruang awam ditutup. Berikutan ini, risiko exploitasi dan keganasan seksual terus meningkat, ditambahkan pula dengan kegawatan ekonomi dan kekurangan makanan membuatkan sebilangan ibu bapa mengambil keputusan untuk mengahwini anak-anak mereka walaupun masih di bawah umur.

Kami telah menganalisis satu laporan bertajuk "Kesan Wabak COVID-19 Ke Atas Perancangan Keluarga dan Mengakhiri Keganasan Berasaskan Gender, Khitan Perempuan dan Perkahwinan Bawah Umur: Bagaimana Pandemik Mengancam Pencapaian Hasil Transformatif Oleh UNFPA", dengan sumbangan bersama oleh Avenir Health, Johns Hopkins University (Amerika Syarikat) dan Victoria University (Australia). Laporan ini menyimpulkan bahawa COVID-19 akan mengganggu-gugat pelbagai usaha yang telah dilaksanakan untuk mengurangkan perkahwinan bawah umur, terutamanya disebabkan oleh impak daripada larangan pergerakan dan kewajipan penjarakkan sosial.

Usaha untuk menangani dan mengakhiri perkahwinan bawah umur di negara ini tidak menunjukkan kemajuan yang ketara. Setakat ini, tiada usaha yang sungguh untuk membendung perkahwinan bawah umur walaupun wujudnya pelan lima tahun yang dipanggil "Pelan Strategi Kebangsaan Bagi Menangani Punca Perkahwinan Bawah Umur" yang dilaksanakan oleh Kementerian Pembangunan Wanita, Keluarga Dan Masyarakat pada Januari 2020. Tiada juga data atau maklumat terbaru daripada kementerian tentang pandemik yang telah menjaskan kesihatan dan pendidikan kanak-kanak, terutamanya dengan perkahwinan bawah umur yang berleluasa. Dapatkan statistik yang dikeluarkan oleh Jabatan Perangkaan Malaysia mengenai perkahwinan bawah umur hanyalah bertarikh pada 2018 yang terkini. Telenisa meminta semua pihak untuk terus memberikan komitmen dan usaha yang cekal agar kita semua mampu menangani masalah perkahwinan bawah umur, terutamanya semasa musim pandemik ini.

## BANTUAN COVID-19 UNTUK WANITA & KELUARGA

Musim pandemik ini membawa kesan yang berbeza ke atas wanita dan lelaki. Wanita lebih terdedah kepada kemudaratannya seperti penderaan fizikal, emosi dan psikologi yang disebabkan oleh konflik dan tekanan keadaan. Pertubuhan Pertolongan Wanita atau Women's Aid Organisation (WAO) telah merekodkan penerimaan panggilan empat kali ganda lebih banyak jika dibandingkan dengan tempoh sebelum PKP dilaksanakan.

Bantuan peringkat awal terhadap pandemik yang dilaksanakan oleh Kementerian Pembangunan Wanita, Keluarga Dan Masyarakat adalah amat mengecewakan. Talian bantuan "Talian Kasih" yang dikendalikan oleh kementerian ini dihentikan selama dua minggu ketika PKP sedang berlangsung. Talian ini hanya dibuka semula selepas menerima kritikan daripada rakyat. Pada awal April 2020, kementerian yang sama menjalankan kempen di laman sosial menasihati wanita untuk mengenakan pakaian yang cantik, hentikan bebelan dan menggunakan nada suara yang tinggi seperti watak kartun Doraemon untuk memikat hati suami demi menjaga kesejahteraan rumah tangga. Kempen itu ditarik balik selepas menerima kritikan hebat daripada rakyat.

Ketersediaan pusat perlindungan khusus untuk mangsa keganasan rumah tangga sudah tidak mencukupi walaupun sebelum wabak melanda. Kementerian Pembangunan Wanita, Keluarga Dan Masyarakat hanya membuka satu pusat

perlindungan sahaja di Kelantan untuk mangsa keganasan rumah tangga.

Kementerian tersebut bersama Yayasan Kebajikan Negara hanya membuka pusat khidmat dan sokongan, tetapi bukan pusat perlindungan. Namun begitu, Ahli Dewan Negeri Selangor YB Siti Mariah telah menunjukkan usahanya dengan membuka beberapa pusat perlindungan sementara di hotel dan Airbnb selama beberapa bulan.

Kegawatan ekonomi ini telah membawa kesan yang mendalam ke atas isi rumah di negara kita dan juga seluruh dunia. Ketika penglibatan kami mendengar keluhan wanita di peringkat akar umbi, kami telah menerima pelbagai maklum balas tentang kesusahan yang mereka hadapi semasa musim pandemik. Kesusahan seperti menyediakan makanan yang mencukupi untuk anak-anak, menyesuaikan keadaan dengan kelas atas talian untuk anak-anak dengan sambungan internet yang tidak stabil, peralatan elektronik yang tidak mencukupi untuk memenuhi permintaan kelas atas talian, tiada bimbingan untuk memindahkan perniagaan dari kedai ke platform atas talian, kekurangan bimbingan dan pertolongan untuk usahawan wanita, termasuk juga persekitaran yang tidak sesuai untuk pembelajaran di rumah terutamanya di perumahan kos rendah yang tidak terurus.

Sepanjang April dan Mei 2020, Telenisa telah menerima banyak pertanyaan mengenai bantuan

makanan dan kewangan. Ramai wanita yang menguruskan keluarga mereka menerima kesan hebat disebabkan oleh PKP. Berdasarkan laporan "Families On The Edge" untuk Malaysia oleh United Nations Children's Fund (UNICEF) dan United Nations Population Fund (UNFPA), dianggarkan setiap 1 dalam 4 ketua isi rumah tidak lagi bekerja ketika PKP dilaksanakan. Dapatan ini adalah lebih tinggi daripada tahun 2019 dan 5 kali lebih tinggi daripada purata nasional. Kebanyakan daripada mereka yang telah hilang pekerjaan tidak mempunyai sebarang bentuk perlindungan pekerjaan.

Susulan itu, Sisters In Islam bersama ahli persatuan, pekerja dan sahabat kami telah berjaya mengumpul dana untuk bantuan makanan dan kewangan. Bantuan tersebut telah diagihkan kepada 74 isi rumah yang merangkumi 296 penerima yang bertempat di Selangor, Kuala Lumpur dan Sabah. Dengan bantuan pasaraya tempatan "Pak Grocer", kami telah berjaya membuat pengedaran bakul makanan kepada penerima di Lembah Klang.

Bantuan tersebut kami khususkan di kalangan klien Telenisa yang berstatus ibu tunggal, warga emas dan keluarga asnaf daripada golongan B40, termasuk juga dengan penerima bantuan yang diuruskan oleh Gabungan Hak Wanita Islam Malaysia (GAHWI), satu persatuan wanita akar umbi.

## PERKEMBANGAN TERKINI

---

Pada awal tahun 2021, terdapat beberapa perkembangan terhadap kes-kes berkaitan taraf undang-undang Islam. Di sini kami menampilkan sebilangan kes-kes tersebut untuk pengetahuan pembaca kami.

Pada Februari 2021, Mahkamah Persekutuan sebulat suara telah memutuskan bahawa penetapan seks luar tabii sebagai jenayah di bawah Seksyen 28 Enakmen Jenayah Syariah (Selangor) 1995 sebagai tidak sah dan tidak mengikut Perlembagaan Persekutuan. Seorang lelaki berusia 35 tahun telah memohon usul untuk mencabar Seksyen 28 tersebut yang didakwa ke atasnya kerana cubaan untuk melakukan seks di luar tabii. Mahkamah Persekutuan memutuskan Seksyen 28 itu telah bercanggah dengan Perkara 1 dari Senarai Negeri yang sudah termaktub bahawa kerajaan negeri tidak mempunyai kuasa untuk membuat undang-undang berdasarkan perkara yang sudah terkandung dalam Senarai Persekutuan. Dengan itu, Seksyen 28 tidak boleh dilaksanakan dan patut dipinda keluar daripada Enakmen Jenayah Syariah (Selangor) 1995.

Pada bulan Februari juga, Rosliza berusia 39 tahun yang terlahir beribukan wanita beragama Buddha dan berayahkan lelaki Muslim telah memenangi kes mahkamah yang berlangsung selama enam tahun. Wanita itu telah diiktiraf sebagai bukan Islam selepas Mahkamah Persekutuan membenarkan usulnya. Rosliza telah memohon ke tiga peringkat mahkamah sebelum ini. Dia akui bahawa dia seorang anak tidak sah taraf dan mendiagn ibunya ialah seorang wanita beragama Buddha yang bernama Yap Ah Mooi. Di bawah Seksyen 2 Enakmen Pentadbiran Agama Islam (Selangor) 2003, tidak terkandung terma “bapa” untuk anak yang tidak sah taraf. Rosliza turut akui bahawa dia bukan seorang yang mempraktikkan agama Islam. Maka, undang-undang Syariah negeri Selangor yang diguna pakai ke atas Muslim sahaja tidak ada kuasa ke atasnya.

Sembilan orang panel hakim yang diketuai oleh Ketua Hakim Negara Tun Tengku Maimun Tuan Mat telah sebulat suara menghormati usul bahawa Rosliza bukan seorang Muslim, tiada bukti atau

rekod bahawa ibunya telah memeluk Islam atau mempunyai perkahwinan Islam. Kes ini adalah berbeza daripada kes Lina Joy di mana Lina yang dilahirkan Muslim telah kemudiannya menukar agama dan meminta mahkamah untuk melucutkan taraf agama asalnya. Kes Lina Joy berbeza daripada kes Rosliza di mana kes Rosliza ialah suatu kes ab initio (dari permulaan) dan bukan kes keluar dari agama.

Pada Mac 2021 pula, Mahkamah Tinggi Kuala Lumpur telah membenarkan pengikut Kristian seluruh negara menggunakan perkataan-perkataan Arab seperti kalimah “Allah”, “Baitullah”, “Kaabah” dan “solat” untuk tujuan pendidikan dan penerbitan buku-buku agama. Mahkamah telah mematuhi dasar kebebasan beragama yang termaktub di bawah Perkara 3, 8, 11 dan 12 di dalam Perlembagaan Persekutuan. Di bawah Perkara 8 di dalam Perlembagaan Persekutuan, mahkamah telah menerangkan bahawa pemohon mempunyai hak kesaksamaan sebagai warganegara di bawah dasar keagamaan dan pentadbiran perundangan.

# Bagaimana Anda Boleh Membantu?

Sumbangan anda boleh disalurkan menerusi:

**SIS Forum (Malaysia) - 5641 8240 5457 (Maybank)**

## Organisasi Yang Membantu dan Menyokong Wanita

All Women's Action Society (AWAM) 03-7877 4221 Kaunseling, gangguan seksual & kes rogol	Talian NUR 15999 Keganasan rumah tangga, penderaan kanak-kanak	Legal Aid Centre (Selangor) 03-5510 7007 Khidmat guaman percuma	Women's Aid Organisation (WAO) 03-7965 3488 Kaunseling & pusat perlindungan untuk wanita mangsa keganasan	Perak Women for Women (PWW) 05-546 9715 Kaunseling
Sabah Women's Action Resource Group (SAWO) 088-269 291 Kaunseling & nasihat guaman percuma	Sarawak Women for Women Society (SWWS) 082-422 660 Kaunseling & nasihat guaman percuma	Legal Aid Centre (Kuala Lumpur) 03-2693 1440 Khidmat guaman percuma	Women Centre for Change (WCC) Seberang Prai 04-398 8340 Kaunseling & nasihat guaman percuma	Women Centre for Change (WCC) Penang 04-228 0342 Kaunseling & nasihat guaman percuma

# Sisters in Islam

SIS FORUM - MALAYSIA (266561W)

## SIS Forum (Malaysia) - Sisters in Islam

No. 4, Lorong 11/8E, 46200 Petaling Jaya,  
Selangor Darul Ehsan, Malaysia.

T +603 7960 3357 / 5121 / 6733  
E sis@sistersinislam.org.my

W www.sistersinislam.org



Sisters In Islam



@sistersinislam.my



@SistersInIslam



SistersinIslamMYS

## Telenisa

No. 4, Lorong 11/8E, 46200 Petaling Jaya,  
Selangor Darul Ehsan, Malaysia.

T +603 7960 8802  
E telenisa@sistersinislam.org.my



@telenisa.sis



@telenisa\_sis



@telenisa

Beroperasi setiap Selasa, Rabu & Khamis  
Dari 10:00 a.m. – 5:00 p.m.